

國子監志

國子監志卷五

廟志五

祀位圖說

先賢林放

唐開元二十七年從祀贈清河伯宋大中祥符
二年追封長山侯明嘉靖九年因張璁言改祀
於鄉

國朝雍正二年復祀稱先賢為西廡先賢之首
先賢宓不齊

唐開元二十七年從祀贈單伯宋大中祥符二年追封單父侯明嘉靖九年改稱先賢宓子國朝稱先賢不稱子

先賢公治長

唐開元二十七年從祀贈莒伯宋大中祥符二年追封高密侯明嘉靖九年改稱先賢公治子國朝稱先賢不稱子

先賢公哲哀

唐開元二十七年從祀贈鄖伯宋大中祥符二

年追封北海侯明嘉靖九年改稱先賢公哲子國朝稱先賢不稱予

先賢高柴

唐開元二十七年從祀贈共伯宋大中祥符二年追封共城侯明嘉靖九年改稱先賢高予國朝稱先賢不稱予

先賢樊須

唐開元二十七年從祀贈樊伯宋大中祥符二年追封益都侯明嘉靖九年改稱先賢樊予

先賢商澤

唐開元二十七年從祀贈睢陽伯宋大中祥符
二年追封鄆平侯明嘉靖九年改稱先賢商子
國朝稱先賢不稱子

先賢巫馬施

唐開元二十七年從祀贈鄆伯宋大中祥符二
年追封東阿侯明嘉靖九年改稱先賢巫馬子
國朝稱先賢不稱子

先賢顏辛

唐開元二十七年從祀贈蕭伯宋大中祥符二年追封陽穀侯明嘉靖九年改稱先賢顏子國朝稱先賢不稱子

先賢曹卹

唐開元二十七年從祀贈曹伯宋大中祥符二年追封上蔡侯明嘉靖九年改稱先賢曹子國朝稱先賢不稱子

先賢公孫龍

唐開元二十七年從祀贈黃伯宋大中祥符二年追封枝江侯明嘉靖九年改稱先賢公孫子國朝稱先賢不稱予

先賢秦商

唐開元二十七年從祀贈上洛伯宋大觀四年從議禮局言補贈馮翊侯明嘉靖九年改稱先賢秦子

國朝稱先賢不稱予

先賢顏高

唐開元二十七年從祀贈鄉鄧伯宋大中祥符
二年追封雷澤侯明嘉靖九年改稱先賢顏子
國朝稱先賢不稱予

先賢壞駟赤

唐開元二十七年從祀贈北徵伯宋大中祥符
二年追封上邦侯明嘉靖九年改稱先賢壞子
國朝稱先賢不稱予

先賢石作蜀

唐開元二十七年從祀贈邱邑伯宋大中祥符

二年追封成紀侯明嘉靖九年改稱先賢石子國朝稱先賢不稱子

先賢公夏首

唐開元二十七年從祀贈亢父伯宋大觀四年從議禮局言補贈鉅平侯明嘉靖九年改稱先賢公夏子

國朝稱先賢不稱子

先賢后處

唐開元二十七年從祀贈營邱伯宋大觀四年

從議禮局言補贈膠東侯明嘉靖九年改稱先賢后子

國朝稱先賢不稱子

先賢奚容歲

唐開元二十七年從祀贈下邳伯宋大中祥符二年追封濟陽侯明嘉靖九年改稱先賢奚子國朝稱先賢不稱子

先賢顏祖

唐開元二十七年從祀贈臨沂伯宋大觀四年

從議禮局言補贈富陽侯明嘉靖九年改稱先賢顏子

國朝稱先賢不稱子

先賢句井疆

唐開元二十七年從祀贈淇陽伯宋大中祥符二年追封滎陽侯明嘉靖九年改稱先賢句子

國朝稱先賢不稱子

先賢秦祖

唐開元二十七年從祀贈少梁伯宋大中祥符

二年追封鄆城侯明嘉靖九年改稱先賢秦子國朝稱先賢不稱子

先賢縣成

唐開元二十七年從祀贈鉅野伯宋大中祥符二年追封武城侯明嘉靖九年改稱先賢縣子國朝稱先賢不稱子

先賢公祖句茲

唐開元二十七年從祀贈期思伯宋大中祥符二年追封卽墨侯明嘉靖九年改稱先賢公祖

子

國朝稱先賢不稱子

先賢燕伋

唐開元二十七年從祀贈漁陽伯宋大中祥符
二年追封汧陽侯明嘉靖九年改稱先賢燕子
國朝稱先賢不稱子

先賢樂欬

唐開元二十七年從祀贈昌平伯宋大觀四年
從議禮局言補贈建城侯明嘉靖九年改稱先

賢樂子

國朝稱先賢不稱予

先賢狄黑

唐開元二十七年從祀贈臨濟伯宋大中祥符
二年追封林慮侯明嘉靖九年改稱先賢狄子
國朝稱先賢不稱予

先賢孔忠

唐開元二十七年從祀贈汝陽伯宋大中祥符
二年追封鄆城侯明嘉靖九年改稱先賢孔忠

子

國朝稱先賢不稱子

先賢公西歲

唐開元二十七年從祀贈祝阿伯宋大中祥符
二年追封徐城侯明嘉靖九年改稱先賢公西
子

國朝稱先賢不稱子

先賢顏之僕

唐開元二十七年從祀贈東武伯宋大中祥符

二年追封宛句侯明嘉靖九年改稱先賢顏子
國朝稱先賢不稱子

先賢施之常

唐開元二十七年從祀贈乘氏伯宋大中祥符
二年追封臨濮侯明嘉靖九年改稱先賢施子
國朝稱先賢不稱子

先賢申棟

唐開元二十七年從祀贈魯伯宋大中祥符二
年追封文登侯明嘉靖九年改稱先賢申子

國朝稱先賢不稱子

先賢左邱明

唐貞觀二十一年以經師從祀宋大中祥符二年追封瑕邱伯政和元年避

聖諱改中都伯明嘉靖九年改稱先儒左子崇禎十五年改稱先賢

國朝稱先賢不稱子

先賢秦冉

唐開元二十七年從祀贈彭衙伯宋大中祥符

二年追封新息侯明嘉靖九年因張璁言停其從祀

國朝雍正二年復祀稱先賢

先賢牧皮

國朝雍正二年

詔增從祀稱先賢

先賢公都子

宋政和五年追封平陰伯從祀孟廟

國朝雍正二年

詔增從祀稱先賢

先賢公孫丑

宋政和五年追封壽光伯從祀孟廟
國朝雍正二年

詔增從祀稱先賢

先賢張載

宋淳祐元年從祀封鄆伯明嘉靖九年改稱先
儒張子崇禎十五年改稱先賢位在七十子之

下漢唐諸儒之上

國朝稱先賢不稱子。

先賢程頤

宋淳祐元年從祀封伊陽伯元至順元年加洛
國公明嘉靖九年改稱先儒程子崇禎十五年
改稱先賢位在七十子之下漢唐諸儒之上
國朝稱先賢不稱子。

右三十八人竝西廡東面北上。

國子監志卷六

廟志六

祀位圖說

先儒公羊高

唐貞觀二十一年從祀宋大中祥符二年追封臨淄伯明嘉靖九年改稱先儒公羊子

國朝稱先儒不稱子

先儒伏勝

唐貞觀二十一年從祀宋大中祥符二年追封

乘氏伯明嘉靖九年改稱先儒伏予

國朝稱先儒不稱予

先儒董仲舒

元至順元年從祀明洪武二十九年追封江都
伯成化二年改封廣川伯嘉靖九年改稱先儒

董子

國朝稱先儒不稱予

先儒后蒼

明嘉靖九年從祀稱先儒后予

國朝稱先儒不稱子

先儒杜子春

唐貞觀二十一年從祀宋大中祥符二年追封
緜氏伯明嘉靖九年改稱先儒杜子

國朝稱先儒不稱子

先儒諸葛亮

國朝雍正二年

詔增從祀稱先儒

先儒王通

明嘉靖九年從祀稱先儒王子

國朝稱先儒不稱子

先儒陸贊

國朝道光六年以御史吳傑請

諭內閣唐臣陸贊明體達用學術精粹其論數十百篇皆本仁義炳於丹青凡所敷陳悉原經術綜其生平推賢讓能舉直錯枉正以守己忠以事君道與伊傅爭衡文與典謨接軫雍正年間有

旨褒其勲業稱為千古名臣洵能遠契心傳有功正學

著從祀

文廟東廡列於隋臣王通之次稱先儒

先儒范仲淹

國朝康熙五十四年

允部臣議覆學政余正健之請從祀稱先儒

先儒歐陽修

明嘉靖九年從祀稱先儒歐陽子

國朝稱先儒不稱子

先儒楊時

元至正二十二年封吳國公贈太師明宏治八年從祀封將樂伯嘉靖九年改稱先儒楊子國朝稱先儒不稱子

先儒羅從彦

明萬曆四十二年從祀稱先儒羅子國朝稱先儒不稱子

先儒李侗

元至正二十二年封越國公贈太師明萬曆四十二年從祀稱先儒李子

國朝稱先儒不稱子

先儒呂祖謙

宋景定二年從祀封開封伯明嘉靖九年改稱

先儒呂子

國朝稱先儒不稱子

先儒蔡沈

元至正二十二年封建國公贈太師明正統二年從祀成化二年封崇安伯嘉靖九年改稱先

儒蔡子

國朝稱先儒不稱子

先儒陳淳

國朝雍正二年

詔增從祀稱先儒

先儒魏了翁

國朝雍正二年

詔增從祀稱先儒

先儒王柏

國朝雍正二年

詔

增從祀稱先儒

先儒趙復

國朝雍正二年。

增從祀稱先儒

先儒許謙

國朝雍正二年。

增從祀稱先儒

先儒吳澄

明正統八年從祀封臨川郡公嘉靖九年因張

璡言停其從祀

國朝乾隆二年復祀稱先儒

先儒胡居仁

明萬曆十二年從祀稱先儒胡子

國朝稱先儒不稱子

先儒王守仁

明萬曆十二年從祀稱先儒王守

國朝稱先儒不稱子

先儒羅欽順

國朝雍正二年

詔增從祀稱先儒

先儒黃道周

國朝乾隆四十一年

賜謚忠端道光五年

允部臣議覆閩浙總督趙慎畛之請從祀稱先儒

先儒湯斌

國朝乾隆元年

賜謚文正道光三年以通政司參議盧浙請

諭內閣原任尚書湯斌學術精醇順治年間有旨褒其品行清端康熙年間有

旨稱其老成端謹至其政績卓著則禁侈靡興教化舉善懲貪興利除弊官嶺北時擒獲巨寇以靖地方巡撫江蘇時毀不經之祀化闢很之風奏豁民欠議減賦額還京之日部民送者十餘萬人其他奏議忠言謙論剴切詳明正色立朝始終一節所學主於堅苦自持事事講求實用著書立說深醇篤實中正和平洵能倡明正學遠契心傳湯斌著從

祀

文廟東廡列於明臣羅欽順之次稱先儒

右二十六人竝東廡西面北上

國子監志卷七

廟志七

祀位圖說

先儒穀梁赤

唐貞觀二十一年從祀宋大中祥符二年追封
襲邱伯政和元年避

聖諱改睢陵伯明嘉靖九年改稱先儒穀梁子

國朝稱先儒不稱子

先儒高堂生

唐貞觀二十一年從祀宋大中祥符二年追封
萊蕪伯明嘉靖九年改稱先儒高堂子

國朝稱先儒不稱子

先儒孔安國

唐貞觀二十一年從祀宋大中祥符二年追封
曲阜伯明嘉靖九年改稱先儒孔安國子
國朝稱先儒不稱子

先儒毛萇

唐貞觀二十一年從祀宋大中祥符二年追封

樂壽伯明嘉靖九年改稱先儒毛子

國朝稱先儒不稱子

先儒鄭康成

唐貞觀二十一年從祀宋大中祥符二年追封高密伯明嘉靖九年因張璁言改祀於鄉國朝雍正二年復祀稱先儒

先儒范甯

唐貞觀二十一年從祀宋大中祥符二年追封鄆陵伯明嘉靖九年因張璁言改祀於鄉

國朝雍正二年復祀稱先儒

先儒韓愈

宋元豐七年從祀封昌黎伯明嘉靖九年改稱

先儒韓子

國朝稱先儒不稱子

先儒胡瑗

明嘉靖九年從祀稱先儒胡子

國朝稱先儒不稱子

先儒司馬光

宋咸淳三年從祀明嘉靖九年改稱先儒司馬子

國朝稱先儒不稱子

先儒尹焞

國朝雍正二年

詔增從祀稱先儒

先儒胡安國

元至正二十二年封楚國公贈太師明正統二年從祀成化二年封建寧伯嘉靖九年改稱先

儒胡子

國朝稱先儒不稱子

先儒張栻

宋景定二年從祀封華陽伯明嘉靖九年改稱

先儒張子

國朝稱先儒不稱子

先儒陸九淵

明嘉靖九年從祀稱先儒陸子

國朝稱先儒不稱子

先儒黃榦

國朝雍正二年

詔增從祀稱先儒

先儒真德秀

元至正二十二年封福國公贈太師明正統二年從祀成化二年封浦城伯嘉靖九年改稱先儒真子。

國朝稱先儒不稱子

先儒何基

國朝雍正二年

詔增從祀稱先儒

先儒陳浩

國朝雍正二年

詔增從祀稱先儒

先儒金履祥

國朝雍正二年

詔增從祀稱先儒

先儒許衡

元皇慶二年從祀明嘉靖九年改稱先儒許子
國朝稱先儒不稱子

先儒薛瑄

明隆慶五年從祀稱先儒薛子

國朝稱先儒不稱子

先儒陳獻章

明萬曆十二年從祀稱先儒陳子

國朝稱先儒不稱子

先儒蔡清

國朝雍正二年

詔增從祀稱先儒

先儒呂坤

國朝道光六年

允部臣議覆河南巡撫程祖洛之請從祀稱先儒

先儒孫奇逢

國朝道光八年以御史張志廉請

諭內閣孫奇逢學術中正醇篤力行孝弟其講學著書以慎獨存誠實足扶持名教不愧先儒孫奇逢

著從祀

文廟西廡列於明臣呂坤之次稱先儒

先儒劉宗周

國朝乾隆四十一年

賜謚忠介道光二年以御史馬步蟾請

諭內閣明臣劉宗周植品益官致命遂志實為明季
完人其講學論心著書立說粹然一出於正洵能
倡明正學扶持名教劉宗周著從祀

文廟西廡列於明臣蔡清之次稱先儒

先儒陸隴其

國朝雍正二年

詔准從祀稱先儒乾隆元年

賜謚清獻

右二十六人竝西廡東面北上

謹案從祀諸賢唐迄宋初竝列殿上至政和二年從祀新儀成殿上惟祀配位哲位諸弟子及先儒分列東西舍是為兩廡從祀之始明易像為主自四配以下均去封爵槩稱先賢先儒而

位次或進或退。厯朝沿革不一。

國朝監於前代。於祀位尤多所增復。康熙五十四年。

聖祖仁皇帝允部臣議覆學政余正健請以范仲淹學

問精純宜從祀西廡先賢韓愈之次。雍正二年。

世宗憲皇帝命增復祔饗先賢先儒。於是廷臣集議。宜復祀先賢。蓮、瑗、林、放、秦、冉、顏、何四人。增祀先賢。

牧皮縣會樂正克萬章公都子公孫丑六人。復

祀先儒。漢鄭康成、范甯二人。增祀先儒。漢諸葛

亮宋尹焞黃榦陳淳魏了翁何基王柏陳澔元
趙復金履祥許謙明蔡清羅欽順及

本朝陸龜其共十四人又以先賢先儒位次
閩里及直省各學俱以時代為序惟國子監向分
先賢先儒為序因通行直省悉依國子監序列
乾隆二年尚書甘汝來請復吳澄從祀禮部議
准位列先儒趙復之次十八年

高宗純皇帝復命廷臣考據史傳於先賢先儒分列之
中復按年序次二十九年監臣奏言先賢哲位

配饗

殿上者例不書名所以別於兩廡從祀賢儒也乾
隆三年升祔有子神牌未經更正請改稱有子
而不書名得

旨允行遂為定制道光二年御史馬步騤以明劉宗周
請三年通政司參議盧漸以

本朝湯斌請五年閩浙總督趙慎畛以明黃道周
請六年河南巡撫程祖洛以明呂坤請御史吳
傑以唐陸贊請八年御史張志廉以孫奇逢請

均蒙

俞准令欽遵

欽定位次詳錄於右并備注歷代封爵及從祀先後於下以備參考焉

附

元

皇慶二年夏六月甲申以宋儒周敦頤程顥
弟頤張載邵雍司馬光朱熹張栻呂祖謙及故
中書左丞許衡從祀

孔子廟廷

元史
仁宗紀

謹案周子等九人南宋雖經詔祀而復有是命者以元初制未祀也

延祐六年冬十二月壬戌封宋儒周敦頤為道

國公

同上

至順元年秋閏七月詔加程顥程頤封爵

靖通
綱

又冬十二月己酉以董仲舒從祀

孔子廟位列七十子之下

元史
文宗紀

至正十九年十一月浙江行省照磨胡瑜言楊時親得程門之傳李侗傳河洛之學以授朱子胡安國羽翼春秋蔡沈從學朱子發明書義真德秀博學窮經踐履篤實俱應錫爵從祀

廟廷二十一年七月下禮部及三院議至二十二

年八月禮部定俱贈太師不予從祀

元史祭
祀志

明

宣德三年命禮部考正從祀先賢名位頒示天下從四川萬縣訓導李譯言也

明史
禮志

謹案學典載宣德元年年富言儒學文廟哲廟或置木牌或為塑像或封爵差詔或位次失序甚者闕而不置請依洪武定例重校刊布未知孰是

正統元年夏閏六月丁卯正兩廟從祀名爵位次頒圖於天下學校南雍志

謹案學典從宋廣言也

二年六月以宋儒胡安國蔡沈真德秀從祀

孔子廟廷

典學

八年湖廣慈利教諭蔣明言吳澄不下許衡請予從祀下大學士楊士奇議行之

明史
禮志

成化二年春正月追封從祀諸儒未有爵者

而有

志

謹案學典作三年六月從商輅之請今照南雍志作是年追封者董仲舒胡安國蔡沈真德秀四人也

三年二月浙江按察司僉事辛訪請以何基王柏金履祥許謙從祀下部議祀於鄉又六月侍

讀學士劉定之以陳澔有功禮記請從祀不允

典學

宏治八年秋七月丁亥封宋儒楊時將樂伯從祀

孔子廟廷

明史孝宗紀

謹案春明夢餘錄作正統八年八月閩里文獻考作宏治九年者皆訛時監臣謝鐸言楊時廢王安石有功宜與從祀禮臣傅瀚沮之徐溥力主鐸議乃祀於司馬光之次

嘉靖九年兩廡從祀先賢改用木主同十哲

明史

禮志

又先儒主高一尺三寸四分廣二寸三分厚四
分座高二寸六分長四寸厚二寸赤地墨書題
曰先儒某子去一切封爵

上同

又罷公伯寮秦冉顏何荀況戴聖劉向賈逵馬
融何休王肅王弼杜預吳澄從祀

同上

謹案洪武元年羅恢言公伯寮不宜從祀不報
四年司業宋濂請黜荀況楊雄王弼賈逵杜預

馬融從祀不允宏治元年八月張九功言苟況
馬融王弼揚雄得罪名教宜黜為禮官周洪謨
所却程敏政亦言馬融劉向賈逵王弼何休戴
聖王肅杜預八人雖有訓詁行不足稱公伯寮
秦冉顏何與蘧瑗林放家語不載皆宜罷祀下
禮部議倪岳言王弼之徒立身雖有可議然六
經焜燭賴其講授經得復存七十二子名字自
司馬遷來相沿已久不可輕議十二年吳英中
亦請罷公伯寮馬融范甯荀況王弼之祀監臣

謝鐸又言吳澄不當從祀禮臣傅漸力諫之正德元年何孟春又言公伯寮蘧伯玉不當從祀部議駁之至是張璁緣帝意請正祀典下諸臣會議乃罷十三人從祀

又祀林放蘧瑗盧植鄭衆鄭康成服虔范甯於鄉同上

謹案宏治元年程敏政請祀鄭衆盧植鄭康成服虔范甯五人於鄉蘧瑗亦宜祀於衛林放祀於魯張九功亦請罷瑗祀為周洪謨所却至是

張璁請祀林放七人於鄉下諸臣議行

又以申黨即申張釐去其一

同上

謹案正德元年七月何孟春言史記有申黨家語有申績而皆字子周則績即黨也通典開元贈爵有申根論語釋文鄭康成曰申根蓋申績史記云申黨今黨為黨績為績記寫無疑後漢王政碑云無申黨之欲是以張為黨也索隱謂文翁圖有黨無根是以黨為根也二申竝祀不已瀆乎議上不允至是張璁言申黨宜去諸臣

集議去黨而存根焉

又增后蒼王通歐陽修胡瑗從祀

同上

謹案洪武初王禕請歐陽修從祀不允

宏治元

年八月程敏政言后蒼有功於禮宜與王通胡

瑗二人加爵從祀張九功亦言之為周洪謨所

却至是張璁請四人與蔡元定從祀部議停蔡

而祀四人焉

又進陸九淵從祀

同上

謹案宏治十二年吳英中請祀九淵於鄉至是

從薛侃請從祀

孔廟

隆慶五年以薛瑄從祀

同上

謹案宏治元年張九功請以瑄從祀詔祀於鄉
嘉靖十九年楊瞻樊得仁又請從祀童承毅郭
希顏沮之至是韓楫馬三樂等交章請祀乃祀
於呂祖謙下明史薛瑄傳作六年

萬曆十二年十一月以王守仁陳獻章胡居仁

從祀

典學

謹案先是言官屢請以三人從祀惟居仁衆議無異獻章守仁輿論不一禮臣陸樹聲持之甚力陶大臨議不能奪至是禮臣沈鯉請獨祀居仁而申時行等內主守仁揭薦遂令三人併祀云

四十二年詔以羅從彥李侗從祀

歷代
祀典

謹案學典先是三十七年熊尚文請以二人從祀部議從之上命翰林院詹事府覆議至是始決羅祀東廡位朱子下李祀西廡位南軒上闈

里文獻考作四十七年從丁繼宗之請

崇禎十五年改左邱明稱先賢

明史
禮志

又改宋儒周敦頤程顥程頤張載朱熹邵雍六子稱先賢位七十子下漢唐諸儒上

同上

謹案宏治十二年四月楊廉請以宋五儒與聖門諸子接席於兩廡間超荀況等而處其上部議駁之至是詔議進六子之位僅於太學更置

闕里廟廷及天下學宮未遑頒行也春明夢餘錄載是年十月部議以六子及董仲舒王通俱稱

先賢禮志止稱六子不及仲舒適當從明光